

釋

文

紀

欽定四庫全書

釋文紀卷三十一

明梅鼎祚輯

陳二

江總字總持濟南考城人歷
陳尚書令終隋上開府

羣臣請陳武帝讖文

某位某甲稽首和南十方三世一切諸佛十方三世一
切尊法十方三世一切賢聖見前大德僧皇帝某菩薩

睿哲聰明廣淵齊聖心若虛空照窮般若發弘大誓荷
負衆生神道會昌膺茲景業百王既季運屬艱難五嶽
維塵六軍日動劬勞在念有切皇心既而深悟苦空極
信無我寶臺華柱本非實錄賊城樓櫓苦具茲多遂坐
道場靜居禪室堅固善本具足檀那石壁山河珍車象
馬頭目髓腦妻子國城鑾輅龍章翠帳玉几福德所感
威惠所及莫不肅然大捨供養三尊便欲拂衣崆峒高
步六合到林間而宴坐與釋衆而同遊紫微虛宮黃屋

曠位上靈聳動厚土怔惶弟子等身纏愛惑業構煩惱
天生烝民樹以司牧懔懔黔首非后罔戴豈容至尊居
萬乘而伸獨往之情應在帝王而為布衣之事且蠻夷
猾夏寇賊姦宄燧人警職日照甘泉之火四郊多壘未
肆樓船之威若使七聖遂迷窅然汾水之上八駿沃若
方在瑤池之濱則天下何依羣臣莫奉宗社廟堂有廢
彝則弟子不勝狼狽之切謹捨如干錢如干物仰覲三
寶大衆奉贖皇帝及諸王所捨悉還本位伏願十方三

寶見前大德僧以慈悲力用無礙心坐道放光顯揚宣
說歡喜和合超然降許當使皇帝望雲望日之姿與南
山等固乃聖乃神之德與北極同尊中宮后妃之星金
楨玉幹之戚窮積善之慶盡萬歲之歡玉鑾迴鑣金門
洞啓百辟翹首縉紳竝別願塵勞與雲沴俱銷億兆與
天地同泰慊慊丹愚敢以外請弟子某和南

廣弘明集

金陵攝山棲霞寺碑文并銘

陳李需書宋賜金
紫沙門懷則重書

蓋聞天有神宮地云靈府桑欽博記始敘四衢之塔金

朔著經因知千步之寺至如峯形甌累岫勢堂密亦烏
足言哉南徐州瑯琊郡江乘縣界有攝山者其狀如繖
亦名繖山尹先生記曰山多藥草可以攝養故以攝為
名焉南瞻舊落顧悌鎮戍之塢北望荒村扈謙卜筮之
宅此山西南隅有外道館地俄而疫痢磨滅三清遺法
未明五怖之灾萬善開宗遂變四禪之境倏見齊居士
平原明僧紹空解淵淡至理高妙遺榮軒冕遁蹟巖穴
宋太始中嘗遊此山仍有終焉之志村民野老競來諫

曰山多猛虎毒蛇所以久絕行踐僧紹曰毒中之毒無
過三毒忠信可蹈水火猛獸亦何能為乃刊木駕峯難
草開逕披拂蓁梗結構茅茨廿許年不事人世渡河息
暴擾篋無意皆曰誠至所感有法度禪師家本黃龍來
游白社梵行殫苦法性純備與僧紹冥契甚善嘗於山
舍講無量壽佛經中夜忽有金光照室充中如有臺館
形像豈止一念之間人王照其香蓋八未曾有淵石朗
其夜室於是居士遂捨本宅欲成此寺卽齊永明七年

正月三日度上人之所構也山情率易野製疎朴崖檐
峻絕澗戶幽淡卉木滋榮四時助其彫綺煙霞舒卷五
色成其藻絢居士嘗夢此巖有如來光彩又因閒居依
稀目見昔寶海梵志睡觀花臺智猛比丘行逢影窟故
知神應非遠靈相斯在居士有懷創造俄而物故其第
二子仲璋為臨沂令克荷先業莊嚴龕像首於西峯右
壁與度禪師鑄造無量壽佛坐身三丈一尺五寸通座
四丈并二菩薩倚高三丈三寸若乃圖寫瓌奇刻削宏

壯蓮花瑩目石鏡沈暉藕絲縈髮雲崖失彩項日流影
東方韜其大明面月馳光西照匿其成魄大同二年龕
頂復放光光色身相晃若炎山林間樹下赭如火殿禪
師自識終期欣瞻瑞應以建武四年於此寺順寂豈非
六和精進十念允諧向沐寶池方登金地者也齊文惠
太子豫章文獻王竟陵文宣王始安王等慧心開發信
力明悟各捨泉貝共成福業宋太宰江夏王霍姬藩閨
內德齊雍州刺史田奐方牧貴臣深曉正見妙識來果

竝於此巖阿廣收財施琢磨巨石影擬法身梁太尉臨
川靖惠王道契真如心弘檀密見此山製置踈闊功用
稀少以天監十年八月爰撤帑藏復加瑩飾續以丹青
鏤之銑瑩五分照發千輪啓煥排天堂廡玉露分色接
岫軒墀翠微布影八定之侶步纖草而揚梵三慧之徒
挹飛泉而動色喜園凝靜豈傲吏之凡遊深谷玄虛非
愚公之俗路是以王公縉紳之輩郎吏胥史之屬步林
壑陟臯壤升精舍拜道場莫不洗滌無明澣濯囂暗非

直心之砥路孰能如斯者乎慧振法師志業該練心力
精確度上人將就遷神深相囑付法師聿修厥緒勸助
衆功基業田園多所創置先有名德僧朗法師者去鄉
遼水問道京師清規挺出碩學精詣早成波若之性夙
植尸羅之本聞方等之指歸弘中道之宗致北山之北
南山之南不游皇都將涉三紀梁武皇帝能行四等善
悟三空以法師累降徵書確乎不拔天監十一年帝乃
遣中寺釋僧懷靈根寺釋慧令等十僧詣山諮受經論

大義賈誼曰學聖道如日之明孫卿曰登高山知天之
峻今之探賾其此之謂南蘭陵蕭珍幽棲抗志獨法絕
羣遁世茲山多歷年所臨終遺言葬法師墓側還符田
豫託西門之塚更似梁鴻偶要離之瘞又按搜神錄云
楚靳神在今臨沂縣齊永明初神詣法度道人受戒自
通曰靳尚即楚大夫之靈也大同元年二月五日神又
現形著菩薩巾披袈裟閒雅甚都來入禪堂請寺衆說
法崑嶺之中百神所在首陽之路八駟並驅未有修淨

界之品詣得道之僧整忍辱之衣入安禪之室是知名
山大澤靈異憑依者矣慧布法師幼落煩惱早出塵勞
律儀明白貞節峻遠貫綜三乘不自媒銜楷模七衆無
所詆訶曩日靜憩鍾巖余便覲止餐仁飲德十有餘年
頃於攝阜受持珠戒佩服之敬雖敢怠於斯須汲引之
勞且曷伸於報効矣夫言意難盡鉛槧易凋固比河山
莫如金石凡諸徵應并預隨喜並勒於碑左乃為頌曰
漫漫心火冥冥世流論生若寄喻死如休三明未了十

智難周盡纏癡愛豈離瘡疣敬仰鷄足恭聞鷲頭斯風
可美其路可由我開梵宇面壑臨丘我圖靈蹟果植因
修兼金畫績泐石彫鏤連雲出沒泄雨沈浮經行松磴
禪坐蕙樓澗風長瀉崖溜懸抽花臺似雪夏室疑秋名
僧宴息勝侶薰修三乘謂筏六度為舟金幢合蓋寶駕

驅輶地祇來格天衆追游五時無爽七處相侔辭題翠

琰字勒銀鉤賢乎樂餌過客宜畱

此碑經唐會昌毀廢後已曾重立至今其

石斷缺文字訛隱寺主僧契先購石依本寫之康定
元年三月十七日鐫立地云一作地之藥草作草藥

猛虎作狼虎行踐作行踪無意作無立布影作抽影之
徒作之僧玄虛作虛玄京師作京華經論作三論菩薩
作升州禪堂作禪
室畫續作續畫

大莊嚴寺碑

蓋聞僧伽水濱波斯創以禪地醍醐山頂舍那肇其梵
域此乃徃劫之勝因上方之妙範於是俯察地勢懸之
以水仰惟星極揆之以日百堵咸作千坊洞啓前望則
紅塵四合見三市之盈虛後睇則紫閣九重連雙闕之
聳峭加以園習歡喜水成功德池溢甘露不因玉掌樹

搖音樂無待金奏薰鑪夜焚遙來海岸之香法鼓早謹非
動泗濱之石擢莖金表跨八萬之俱成界道銀繩面四衢
而拓製厠壁綴珠凌丹霞而結宇雕光鏤采望紫極而開
軒俯看驚電影徹瑠璃之道遙拖宛虹光徧水精之域層
楹刻桷風伯走而未升虛橑飛甍雨師攀而不逮銘曰
灼爍金莖崔嵬銀表翔鸞仰翥威鳳靈矯木密連綿
香泥繚繞日圖檐外荷披棟杪翠落陰虬珠填陽鳥
高僧累萃碩學滋多弘宣方等博綜園阨皆傷寸晷

竝悟尺波式旌鏤碣無待雕戈標年剝土比數恒河

建初寺瓊法師碑

夫智慧精進皆曰第一妙德淨名竝稱不二若乃幹五欲之
泥解六情之網禦寶車之跡面香城之路荷像法引人倫惟
此法師心力備矣東山北山之部貫花散花之句並編柳成
簡題蒲就業學非全朔無待冬書師夢尹儒自知秋駕銘曰
屑屑人世茫茫大千欲流心火意樹身田老驚靈籥孔
惜逝川三空莫辨二諦何詮佛日初照慈雲不偏秋露